



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim

tiryimiyim@aolima

tir yimiyim

TAPAK 7

Cong-i Rajasthan nung takok ngura Centre nunga takok angutsü: Kharge

Nawaz Sharif Pakistan-i meyipa arutsü renema lir

VOL. XXI NO. 10 (ADOK 10) DIMAPUR

SANGTENNÜ (TUESDAY)

MONGPUTENI (OCTOBER) 17, 2023

₹ 5.00

Manipur nung mezüngbuba Naga tsür judge shim

Imphal, October 16, 2023 (Agencies): India Tir Droupadi Murmu-i Manipur High Court nung Judge inyaksü atema Golmei Gaiphulshillu Kabui shimogo.

Hombarnü Manipur High Court nung Acting Chief Justice MV Muralidharan-i Judicial Officer Kabui nem tezüngzüktep agidaktsüogo.

Manipur High Court nung Naga tsür kati justice inyakbaji Kabui ya mezüngbuba lir.

Kabui-i tezüngzüktep agiba sülen osangbener den jembidang linük ozüing nung lateta aliba lai tajungtiba agi nübertem tenzüksü nangzük.

Meimchir asoshi ochi aser temeten agütsüsi aser Manipur nung Acting chief justice aser Manipur High Court nung obendangertemi tuyuba ama lai inyaksü ta Golmei Gaiphulshillu Kabui-isa metetdaksü.

October 13 nü Centre sorkari Golmei Kabui shimba osang metetdakja liasü. Taküm January ita Supreme Court Collegium-i la indang tenüing agüja liasü aser Union Law Minister Arjun Ram Meghwal-i la shimba osang metetdaksü.

Kabui-i 1995 küm Grade III officer ama Manipur Judicial Service nung inyaksü tenzük. La ya Manipur High Court nung mezüngbuba tetsür Registrar liasü aser iba sülen Registrar General inyaker taküm March ita

iba mapa nungi sodi angu. Kabui ya Imphal nung aso aser lai idakji school, college aser law (LLB) education azüing. La kinungbo ya Indian Police Service officer ka lir aser Manipur Police nung Inspector General inyaker.

Kabui Union Manipur, Kakhulong Pei (Thoubei) Authority aser Zeliangrong United Committee Manipur Valley teloktemi sangdong balala nung Golmei Kabui nem tenüingsang agütsüba metetdaksüogo.

Manipur High Court nung lisopur tetsür kati iba ama jenjang anguba ya la mezüngbuba lir ta parnokisa ashi.

Centre-i Manipur nung Chief Justice shim

Külen, Centre-isa October 16 nü Manipur High Court nung Chief Justice inyaksü atema Justice Siddharth Mridul shimba osang metetdaksüogo.

July 6 nü Supreme Court collegium-i Delhi High Court judge Mridul tenüing agütsüba sülen ita asem lir tanü pa shimba osang metetdaksüogo.

Manipur nung February 4 nung Chief Justice melii dang aruogo. Manipur nung taoba Chief Justice PV Sanjay Kumar Supreme Court nung inyaksü ajungketba sülen iba menden tazüing liasü.

Iba jagi Manipur High Court nung senior-most judge Justice MV Muralidharan-i Acting Chief Justice ama inyaka arur.

NBSE-i Class 8 aser 9 tatidang metetdaksür

Kohima, October 16, 2023 (Agencies): November 30 nungi Class 8 aser 9 indang Phase two Final Examination tenzüksü ta Nagaland Board of School Education (NBSE)-i metetdaksüogo.

Class 8 aser 9 tatidangtem December 8 nü tembangtsü. Iba atema NBSE-i Private Schools ajak dang Class 8 aser 9 Examination sangoktsüba ama agütsü tetuyuba agütsüogo.

NBSE nung register süa aliba school ajaki Nagaland Heritage

studies (English and Local dialect), Life Skill Education aser General Knowledge tatidangtem pei sasep nung agütsü metetdaksüogo.

NBSE-isa December 18 matongdang Phase one aser Phase two examination indang consolidated marks aser results parnok ket nung agütsütsü tetuyuba agütsüogo.

Ajungben sodi ka ajuru nunga examination routine memelenshitsu saka tatidang athitsüsa kümra NBSE-i media ajanga osang sangoktsütsü.

CBI-i nisung 6 anema chargesheet benok

Imphal, October 16, 2023 (Agencies): May 4 nü prokshiba video indang ken o atema Central Bureau of Investigation (CBI)-i nisung 6 anema chargesheet ka benokogo.

Manipur nung nisung telok kati tetsür ana mangsa anir senzüba tatalokba bushisüngdangtsü atema CBI aniokba sülen parnoki tanü May 4 ken o atema chargesheet benok.

May 4, 2023 nü Kangpokpi kübok B. Phainom yimtsüing nung tetsürtem dak tashiyim mapa inyaker tebur ana tepset. Iba anogo nisung 900-1,000

shi kati prangpong bener Kangpokpi district kübok B Phainom yimtsüing amak.

Idangji parnoki ki raksatsü, mi senoktsü, osettsüset auya, yimdaklirtem dak teka sangshi, nisung tepset aser tetsürtem dak tim masüba inyaker. Osang angazükba agi iba mapang tetsür asem yimjak nung mangsa anir senzü aser arishi küm 321 tain tetsür ka dak tebur telok kati tashiyim agi shi nung medem.

Iba lendong nungsa nisung telok jagi tetsürtem kinunger ana tepset ta tai tonglojka lir.

PM Modi-i Manipur dang nungi Israel-Hamas atema talila bilemetsür



October 16, 2023 nü Aizawl nung Congress lennir Rahul Gandhi den Congress züingsemtemi 'Padyatra' nung shilem agiba angur.

Aizawl, October 16, 2023 (Agencies): Prime Minister Narendra Modi-i Manipur nung atalokba dang nungibo Israel nung atalokba atema ang talila bilemetsür ta Congress lennir Rahul Gandhi-i ashi.

Hombarnü Rahul-i Mizoram yimtiba Aizawl nung kilometre 2 tashi padyatra nung shilem agiba sülen Raj Bhavan anasa sentong ka nung jembidang "Manipur ya longjema aliba state ka masü saka kin nung ajemdaker state ana lemdangogo" ta pai ashi.

Rahul-i anogo ananü atema Mizoram semdangi arua lir aser paisa "1986 küm Congress-i peace accord sign sütepbpa ajanga Mizoram nung yimjung bener arur" ta ashi.

"PM aser India sorkari Israel nung atalokba atema bilemetsür saka Manipur asoshi mebilemetsür. Manipur nung nisungtem tepsetogo, tetsürtem dak tim masüba inyakogo aser kinü tanurtem tepsetogo" ta

Rahul-isa ashi. "Prime Minister-i Manipur mesemdangba ya maaksü ka lir. Manipur nung ajuruba khuret ya linük kübok tesem aika nung angutsü. Nübo agi tangar memenepertem, lisopurtem aser Dalit nunger tip matemer. India nung sensotem alenbanga ayur" ta paisa metetdaksü.

"BJP-i India tangatetba anema inyaker, parnoki kin, tamangba yimsü aser oshitem dak tenük yoka inyaksangshir. BJP-i linük nung tesempatep aser ozüing alema inyaksangshiba prokshir. Parnoki tila makümba, mangatetba prokshir" ta Rahul-isa shisem.

"BJP-i nür sobaliba, tamangba yimsü aser inyaksangshi nung tenük yoka mapa tamajung inyakdang Mizo National Front (MNF)-i parnok pusema nungiter. Tesüiba küm 5 tsüingda MNF sorkari mapa 2,000 dang adok. Mizoram nung infrastructure aser lenmangtem kanga majung lir

aser MNF sorkar state rongsenketzüing samatsür" ta Rahul Gandhi-isa ashi.

"Drugs ajanga lanuputu raksatsür aser iba ajanga lanur 250 taküm samaogo" ta paisa ashi.

"Congress-i o tazüingla masü saka Mizoram atema mangdang lia jembir. Karnataka, Rajasthan aser Chhattisgarh nung Congress-i ketdangsubaren kanga junga lir" ta paisa ayongzük.

"Onoki nenok sobaliba, tamangba yimsü aser inyaksangshi kümzüka ayutsü, kechiyong Mizo sobaliba, inyaksangshi aser oshi samatsür" ta Rahul-isa ashi.

Züingsem 40 agi akümba Mizoram assembly election November 7 nü agütsü aser December 3 nung votes azüingtsü sentong lir.

Iba atema Congress-i Hombarnü candidate 39 metetdaksüogo.

Minister Kruse-i skill development training nenshir



Kohima, October 16, 2023 (TYO): Women Resource Development and Horticulture Minister Salhoutuonuo Kruse-i skill development training nung temulung agütsütsü tayongzükba agütsü.

Hombarnü Khonoma nung building aser construction workers atema Skill Proficiency Management sentong tembangba nung Minister Kruse-i iba onük jembi.

"Sorkar mapa mali kümogo aser Naga nunger pei sasa tashi aittsüba ya kanga nüngdaka kümogo. Construction sector nung asenoki angazüksüla aser

mapa inyaksü maongka agütsüla" ta lai ashi.

"Asenoki skills aser techniques angazükba sülen asen taküm jenjang tajungba akümtsü aser mapa nunga tashir kuma aotsü" ta Kruse-isa ashi.

Laisa NBOCWBB aser ZIS dang training sentong ayonga agiba atema pelaba metetdaksü.

Western Angami region nungi nisung 48-i Skill Proficiency Management indang first level agiogo. Advanced training of trainers (TOT) 2022-2023 ya building aser tanga construction workers atema agia liasü.

October 9 nungi tenzükba

hopta ka tashi parnok dang plumbing, tiling aser electrical training sayu. Iba sentong ya Nagaland Building and Other Construction Workers Welfare Board (NBOCWBB)-i teyari agütsü aser Zynorique Initiatives Society (ZIN) ajanga ayonga agi.

Sentong nungsa NBOCWBB CEO Chubayanger Aier aser Zynorique Initiatives Society Chairman Richard Belho nati skill development indang jembi.

Minister Kruse-i training nung adener nem completion certificates agütsü aser tile cutter, hammer drill amala osettem angati agütsü.

DC Dimapur, Sachin Jaiswal den tepila sentong agi



Dimapur indang Deputy Commissioner menden yutsusang Sachin Jaiswal, IAS nem akum agüja October 16, 2023 nü DC Dimapur indang Conference Hall nung sentong ka agidang tangokba noksa nung Sachin Jaiswal den Dimapur Deputy Commissioner tasenba Dr. Tinojongshi Chang, NCS angur.

Dimapur, Mongputeni/Oct. 16 (TYO): Dimapur indang Deputy Commissioner menden yutsür aosang Sachin Jaiswal, IAS aser Revenue Officer, Thejavizo Nakhro, tena nem akum agüja tepila sentong ka District Administration Dimapur ajanga October 16, 2023 nü DC Dimapur indang Conference Hall nung ayongzüka liasü.

Iba sentong nung jembidang, pa Nagaland nung district asem nung Deputy Commissioner ama inyaka aru saka Dimapur ya khenyongi balaka liasü, aser pa Dimapur indang DC ama inyakdang shisatsü aika renogo, ta Dimapur indang Deputy Commissioner tejenba Sachin Jaiswal-i ashi.

Dimapur indang DC ama küm ka ser ita pezü ya ayong-ayonga aser temolung süa inyakogo, aser ketdangsurtem, NGOs aser Dimapur nung aliba nüburtemi temeim sayuba aser amalitep akaba atema kanga pelar, ta pai ashi.

Paisa akok tashi tajungtiba nung nüburtem maneni tenzüksü ta shia liasü. Sachin Jaiswal IAS ya promotion nung Commissioner of Taxes ama inyaktsü.

Dimapur indang Deputy Commissioner tasenba, Dr. Tinojongshi Chang, NCS ajanga Dimapur tajungba kumdahtsüsü asoshi külemi inyakba nung ketdangsur aser civil society tem amalitep akatsü imlar, ta shia liasü.

District Administration tenung nung ADC Dimapur, Mhalo Humtsoe-i ashiba agi, DC tejenba ya kanga tekumdang, shisa taka aser lanur tajung ketdangsur ka liasü.

Pa jeret-peretba sempet ajanga danga administrative ketdangsur dang nungi balaka liasü. Pa Dimapur indang DC ama mapang tatsüka dang inyakaka temelenshi kanga liasü, ta lai ashi.

Commissioner of Police, Dimapur, Kevithuto Sophie-i

district officers tem tenung nung jembidang Sachin ya pei mapa angateta khuret abenba nisung ka liasü aser molungsentsü teindang nung inyak, ta ashi.

Paisa district nung ketdangsurtem tenung nung Dimapur indang DC tasenba Dr. Tinojongshi Chang, NCS pela agizüka liasü aser yaritepa külemi inyaktsü ashi.

Iba sentong nung NGOs tenung nung Naga Council Dimapur tir, Business Association of Nagaland, DUCCF, President Indian Red Cross Society, Dimapur Chamber of Commerce, Dobashis aser UDA tenung nung Head DB, staff tenung nung Repachiba nungeri jembia liasü.

Sentong nung Nungshisangla Longkumer-i temeja ken ka aten, UDA Shiluila-i Tsüngrem temoatsü jazüka sarasadem aser SDO (C) Yanthungbemo Kikon-i melepzüing o jembia liasü.

TOAHDCC ajanga Festival of Praise concert ayongzük



Dimapur, Mongputeni/Oct. 16 (TYO): Tribal Old Age Home cum Day Care Centre ajanga Breeze Women Welfare Society den lungjemer International Day of Older Persons nungtem nung 2nd Senior Citizens Festival of Praise Concert sentong Livingstone Foundation International Auditorium nung October 15, 2023 nü ayongzüka liasü.

Iba sentong nung menden

Kilentola Jamir liasü aser Rev. Dr. Weyiete Lohe-i sentong tenzüka sarasadema liasü.

TOAHDCC indang director Imlitongzuk Amri-i iba sentong indang rateta jembidang Senior Citizens Concert ayongzükba nükjidong ashi.

Iba sentong nung Kohima, Chümoukedima aser Dimapur nungi Shilu Amri, Ivukhu Chisho, Silas Care Centre Senior Citizens Fellowship, Dr. Nicky Kire, Akok Tally,

TOAHDCC Senior Citizens, T. Lanusosang, Gugs Chishi, Tsüza Imchen, Rev. Dirang ama teintet rogo kentener temi kenten yimya balala ajanga shilem agia liasü.

Iba sentong nung tambotisang arishi küm 86 tain Anil Roy aser tantsütüla arishi küm 90 tain Purumaya tushia sempet agüja liasü. Iba sentong ya Sungit Longkumer, Asst Pastor, Grace to Glory Church ajanga sarasadema tembang.

Committee on Public Undertakings senden ayonger

Dimapur, Mongputeni/Oct. 16 (TYO): Committee on Public Undertakings (COPU) mendenpuba Imkong L. Imchen-i Department of Industries & Commerce kübok NHTDC, NIDC, NHHDC aser NSMDC aser Department of Geology and Mining den Oral Evidence Cum Adoption Meeting ka October 18, 2023 anüngdang 11:00 ako nungi tenzüka Nagaland Legislative Assembly indang Committee Room nung amentsü ayongzüka liasü.

Iba senden ya C&AG of India indang report asadangtsü asoshi ayonger alitsü.

Iba senden nung Committee indang züngsem ajunga medema arua adentsü ayongzüker, ta sangdong ka ajanga ashi.

Departments/Corporations indang AHOD, HOD aser Managing Director tem ajak iba senden nung 'tendering evidence' asoshi nungdakba kuli kaketem bener arua adentsü ayongzüker, ta sangdong ajanga ashi.

Kohima DPDB ajanga Kohima DC Shanavas den tepila sentong agi



Kohima indang Deputy Commissioner tejenba Shanavas C IAS ajanga October 16, 2023 nü DC indang Office Chamber nung Kohima DC tasenba Kumar Ramnikant IAS agizükdang tangokba noksa ka yangi angur.

Dimapur, Mongputeni/Oct. 16 (TYO): Kohima District Planning & development Board (DPDB) ita shia amenba senden den külemi Deputy Commissioner, Kohima mapa yutsusang Shanavas C, IAS den tepila sentong ka DPDB indang Conference Hall, Kohima nung October 16, 2023 nü agia liasü.

Shanavas-i iba sentong nung jembidang district nung department balala nungi ketdangsur aser nüburtemi masetshie yariba atema pelaba lemsatapa liasü.

Ketdangsur temi team ka ama anibelem agi melaki yariba ajanga tongtipang sentong aser terenlok maparen aika takok ngua agitetogo, ta pai ashi.

Nagaland nung aisü nung terenlok nungdaker, anungji züngsem temi tali tendaka agütsür tajungtiba nung pei mapa inyaktsüla, ta Shanavas-i ashi.

Paisa ketdangsurtem dang shisa kaa telemteba agitsü aser tetsükdaktsü balala aruba mapang atsüngzüka maotsü ajungshia liasü.

Pai DC tasenba den teka amteper inyaktsü ayongzüka liasü.

Iba sentong nung MLA, Dr. Tseilhoutuo Rhutso-i jembidang DC menden yutsüsangi anibelem mesasai district asoshi inyakba atema pelaba lemsatapa aser ano tarutsü nung state terenlok aser temelenshi asoshi lungjemer inyaktsü imlaba shia liasü.

District officers tenung nung Rokovisa Chase, Dy. Registrar, Cooperative Societies, Kohima aser T. Lanusenla Longkumer, NCS, Administrator, KMC

nungertem jembidang Shanavas ya Deputy Commissioner tajungtiba rongnung ka liasü, shibai nüburtem angateta, ajemalua aser temolung agütsür maparen ajak nung yaritepa inyak, ta ashi.

Pa maliba ya jangja-jangja metettsü ta tenati ashi aser mapa tasenba nung takok ngua inyaktsü moaja liasü.

Iba tepila sentong nung menden Additional Deputy Commissioner, Kohima, Rhosiethe Nguori, NCS liasü aser EAC Kohima, Moasunep Jingru-i temeja ken ka aten.

Deputy Commissioner & Vice Chairman DPDB Kohima, Shanavas C IAS lenistüba kübok DPDB senden amendang taoba senden nung lemtetba lepa repringshia liasü aser Association of All Kohima Municipal Ward Panchayats (AKMWP) ajanga "Adoption of Box cutting area" indang jemi aser Administration aser Kohima Municipal Council den shisa agitepa temelaba agütsüsü lemtet.

Society register asütsüba dak sendakba nung SDO(C) aser Chairman, District Screening Committee, Pichano Kikon ajanga 'Rules and Regulations' tasen benoka board-i agizüka ayu.

Tang sorkari agüja aliba guidelines dak alia Kohima District atema criteria tasen bendenloksü ta metetdaksü.

A. K Premkumar, Coy Commandant of Home Guards, Civil Defence & SDRF ajanga department inyakyim PowerPoint presentation agütsü aser taruba senden nung CMO ajanga par department inyakyim osang agütsüsü nungloksü.



SHORT FILM COMPETITION

- The Department of Information & Public Relations invites entries for Short Film competition.
- Films should be 5-7 minutes.
- Selected entries will be awarded with attractive cash prizes and will be screened during the 4th Nagaland Film Festival 2023.

For more details, log on to www.ipr.nagaland.gov.in Send a mail to iprnagaland@gmail.com

Call us: **+91 88611 60084**

Last date of submission **15** Nov. 2023

iprnagaland@gmail.com [Dipr Nagaland](#) [diprnagaland](#) [DIPR Nagaland](#) [DIPR Nagaland](#) [DIPR Nagaland](#)

Cong-i Rajasthan nung takok ngura Centre nunga takok angutsü: Kharge

Jaipur, October 16 (Agencies): Hombarnü Congress party Tir, Mallikarjun Kharge-i, Congress-i Rajasthan assembly election nung takok ngura 2024 küm Lok Sabha election nunga party-i takok ngua Centre nung sorkar akümtsü, ta metetdaksü.



Baran District nung aliba Eastern Rajasthan Canal Project (ERCP) nung awareness campaign ka tenzüksüba sentong nung jembidang Kharge-i, Ato kilonser Narendra Modi-i onük jembidang "red diary" indang jembia Rajasthan nung Chief Minister Ashok Gehlot-i aniba sorkari senotsü tsütsü ochimashi inyakba metetdaksüogo, ta ashi.

"Red diary nungji Congress-i taruba assembly election nunga takok anguba sülen Rajasthan nung sorkar akümtsü ta zülua lir," ta pai ashi.

Kharge-i, "Rajasthan nung Congress sorkar kümra 2024 küm Centre nunga party-i sorkar akümtsü," ta metetdaksü.

2019 küm Lok Sabha

election nung Rajasthan nung BJP MP 25-i takok angu saka parnoki state atema senotsü mesüra tzü memeshizüktet, ta pai ashi.

Congress-i linük tesem ajaklen caste census agitsü ahangba dak sendakba nung Kharge-i, caste census ajanga Congress-i nübürtem tsüngda telemsa adokdaksüner, ta Modi-i Congress nem tai tongloktsür, ta ashi.

"Tamangba yimsü aser kin nung ajemdaker telemsa adokdaksübaji BJP yimya ka lir," ta Kharge-i ashi.

November 25 nü Rajasthan nung assembly menden 200 atema election agitsü aser December 3 nü vote zünga election agiba osang sangdongtsü.

EAM Jaishankar-i Vietnam Foreign Minister den senden amen



October 15, 2023 nü Vietnam kübok Bac Ninh Province nung aliba International Friendship Park nung External Affairs Minister, S Jaishankar-i Rabindranath Tagore indang kürakyanglu semzüksüba sülen tangokba noksa nung angur.

New Delhi, Mongputeni/ October 16 (Agencies): Hombarnü External Affairs Minister, S Jaishankar-i Vietnam Foreign Minister, Bui Thanh Son ajurua senden amendang tenati linük ana tsüngda shishilembaba, energy, defence aser maritime security tsütsü ano taliba amalitepa inyaktsü atema jembiba den külemi Indo-Pacific atema-a jembio.

India aser Vietnam na tsüngda asalentong tesendaktep yangluba sülen küm 50 ajungba nüngtem nung Jaishankar aser Son nati commemorative stamps sayatsü.

Jaishankar-i X ajanga, "Kalaripayattu aser Vovinam sayaba stamps ajanga asen linük anati saisapong jangraba

aser India o Vietnam na tsüngda sobaliba, loktiliba aser nübürtem tsüngda tesendaktep tashi itta aliba sayur," ta metetdaksü.

Amongnü nungi tenzüka Jaishankar-i Vietnam semdang.

Amongnü Jaisahankar-i Bac Ninh Province nung aliba International Friendship Park nung Rabindranath Tagore indang kürakyanglu ka semzüksüba liasü.

Hombarnü Hanoi nung Jaishankar-i 18buba India-Vietnam Joint Commission senden nung shilem agia aden.

Tesülen pai, "Kü den külem co-chair @FMBuiThanhSon dang pelar. Künati yimtenren, defence & maritime security, judicial, shishilembaba aser investment, energy, terenlok,

shisaliok aser training, science & technology aser sobaliba lenlatem nung amalitepa inyaktsü atema o lemtepogo," ta metetdaksü.

Indo-Pacific region nung Indian Ocean, western & central Pacific Ocean aser South China Sea densema lir; iba region nung China-i ambangyima inyakba atema US aser India densema linük aikati iba region teladak asütsü nüngdak, ta jembir.

China-i South China Sea nung mangatettep aliba tesem ajakji parnok meyong ta ashir, ajisüaka Taiwan, Philippines, Brunei, Malaysia aser Vietnam linüktemi South China Sea ya ajak meyong ta ashir.

Jaishankar-i maneni October 19-20 anogotem nung Singapore semdangtsü.

Opposition lenirtem telok kati Palestine Embassy semdang

New Delhi, Mongputeni/ October 16 (Agencies): Tang Israel aser Palestine na tsüngda raraba mapang MP, Danish Ali (BSP) aser taoba mapang MP tem- Mani Shankar Aiyar (Congress) aser KC Tyagi (JDU) nunger densema opposition lenirtemi New Delhi nung aliba Palestine Embassy semdanga Palestine nunger pusemba lemsatepogo.

Palestine Embassy semdangertem rongnungsa CPI (ML) general secretary, Dipankar Bhattacharya aser Samajwadi Party MP, Javed Ali Khan nata densema liasü.

Tesülen osangbenertem den jembidang CPI (ML) lenir, Bhattacharya-i, Gaza nung rara aliba mapang aser meimchirtem timtemba mapang Palestine nunger pusemba lemsateptsü

atema parnoki Embassy semdang, ta metetdaksü.

"India aser tesem ajaklen onokia alima den külemi ola adoker. Yimjung atema ola ya tashiba adoktsüla, kechiyong tang Gaza nung atalokba ya yangji nisung tepsetba dang masü saka iba ya ajanga alima nung Third World War adokdaksütsüsa lir," ta CPI(ML) lenirisa metetdaksü.

October 7 nü Hamas kiralongrartem Israel amakba sülen tang Israel aser Hamas na tsüngda tesashiba raraba ajanga alima nung linüktemi tebilemtsü akar. Germany, United States, France aser United Kingdom ama tashi tulu aliba linüktemi raraba tensa ya tamajungba mekümdaksütsü nüngdak, ta bilema ola adokdar.



2005-2006 nung Uttar Pradesh kübok Nithari yim anasa Noida nung nisung aika tepsetba ken o nung tasüba temerenshi obendang agütsür alir ana- Surendra Koli (abenlen) aser Mohinder Pandher na noksa nung angur. Tena anema kuli peria manguba agi October 16, 2023 nü Allahabad High Court-i tenaprongla chioktsü obendang agütsüogo.



TIR YIMYIM

YIMOBILEM (EDITORIAL)

DIMAPUR SANGTENNÜ, MONGPUTENI (OCTOBER) 17, 2023

Tsökchirtemi Meketbanga Aliba Linük

- *Tangsen Lemtur*

Israel, ta ajaba linük ya lar kidanger linüktem den medemdangra kanga tila ka dang aser tsökchirtemi meketbanga aliba linük ka lir. Küm 2,500 tejaklen yangi alir chichiba Yihuda nungertem linük balalai prokshia aoba sülen Assyria nunger, Babylon, Persia, British, Roman, Turkey aser Greek nunger arua ali. Linük tila aser nütsüng ishika dang süaka tanü alimai Israel linük nung kanga ranglokba kuli aikati shisadanger. Akhi mapang nungi Israel nung rara balala aika rara-a aruba otsü asenoki Laishiba nung angur, aji oda putu ajak nung parnok rara ka mesüra ka nungbosa mazüangi aliba tanü tashi kasa dang aser tang tesüsa Palestine nunger den raradar. Israel nunger raraba shia nisung aikati, iba ya tatembang anogo anasai aruba temaitsü südi, ta bilema asentenshir Laishiba nung shinzüka aliba Lai tekongtem bushia azünger. Akhidang nung Israel nungeri Egypt, Amalek, Midian, Moab, Philistine, Assyria, Babylon mesüra Persia nunger den raraa aruogo aser tang tashi kidanger linük ka mesüra katibo parnok nem timtem agüja arur. Israel linük asoshi Tsüngremer sentong balaka lir, ibayongji temeneni mapa inyaka tesempa agi mapang ajak nung kidanger linüktemi Israel samadaksütsü meranger. Taoba mapang Assyria Chuba Sennacherib, Nazi Germany lenir Adolf Hitler aser taoba mapang Iran Tir Rouhani nungeria Israel linük ya khenyongi samatsütsü merangdangogo, ajisüaka makok. Tenüngsang Ken 83:4 nung "Parnoki shiogo, arung aser parnok kin ka mekümdaktsüi raksatsüdi; Oda Israel tenüng joko mebiletettsüsa" ta shinzüka lir, aser shina aliba ama Hamas Charter nung yamai shia lir "Islam-i Israel khenyongi mesamatsü tashi Israel ya alitsü aser maneni alitsü." 2012 küm Iran Tir-i, "Middle East nung Israel ya tera-yanga mali aser samatsütsüla," ta jembi, 2012 kümsa Iran lenir Ayatollah Ali Khamenei-ia, "Israel ya cancer komo ka lir, aser ibaji alangdoktsüla" ta ashi. Laishiba ajanga, tatembang anogo atongtsü nung Israel nung rara tesashi alitsü shinzüka lir. Küm 2,500 tejaklen Israel nunger tesem ajaklen prokshi ajisüaka tatembang anogo anasa Israel chirtem ajak adenshitsü (Ezekiel 37.21), Yihuda nunger ajak Israel linüki meyipa arutsü (Tazüngkunem 30:3), iba dak alia Israel dak sendakba tatembang anogo temaitsü aika Laishiba nung shia lir. Tatem sabo alima linüktemi Israel sendoktsü aser la anema nokdaktsü ta shin-a lir. 2012 küm UN-i Israel jakdaka anemba telatetba 79 yanglu, iba den külemi UN Human Rights Council Resolutions shilem 40-i Israel anemer. Iba ya mamangtettsüka lir, kechiyong Middle East nung chichiba loktiyimten aliba linükji Israel dang lir. Tanü-a Israel nung mepetmesü jenti lir aser lar tsökchirtem- Syria, Lebanon, Jordan, Saudi Arabia, Hamas, Islamic Jihad, Hezbollah aser Iran linüktemi Israel meketbanga lir. Shin otem ajangasa anüdoklen linüktemi yimtenren tsütsü nungi Israel anemtsü aser Arab-Muslim linüktemi Israel anema inyaka tatemsa Israel linük anema rara tulu adoktsü shia lir; ajioda tang Iran-i Arab-Muslim linüktem longjemer Israel amaktsü ayongdentsü meranger. Ashiko Arab-Muslim linüktemi longjemer Israel maakra Israel pusemertemi Israel pusema raratsü aser ibaji ajanga Third World War tenzüktsü ana nung lir, ibayongji Germany, United States, France aser United Kingdom densema tashi tulu aliba linüktemi Israel-Palestine tsüngda rara tangsa anentsü ayongzüker.

OLEMSABANG

KIYIMBA KULIZÜNG:

Tenlaki Nungi Mainshitsüla Vs Tenlaki Nungi Ainshitsüla

~ Imlı P Lemtur, Jorhat

(*Yashi adok nungi...*)

* **The Council of Trent:**

Tanü tamangertemi benshiba Kiyimba Yimyaren metetsü asoshi, 16th Century nung "The Council of Trent"ya kanga tongtibang council ka lir. Kechiaser iba Council nung ya, Catholic Church nung, Kiyimba Yimyaren ya mapatong (formalization) küma agizük, aser Kiyimba ya temeshi mapa (sacrament) tenet rongnung ka ta Catholic Church nung agizüka ayu. Iba tashi nung Baptist tamangba medenzük liasü.

* **Reformation aser Telemsa Adokba:**

Iba sülen 16th Century nungsa, Protestant Reformation tenzük aser Protestant denomination teloki parnok jurila kiyimba yimyaren amshitsü tenzük. Catholic Church nungi telemsa adokertem rongnung Anglican Church-temi Catholic traditions nungi mepila saka Anabaptists, (Baptist ya Anabaptist nungi razükba lir) amala teloki, ano tali tongmelang kiyimba yimyaren amshitsü tenzük.

* **Tanü Putu Yimyaren:**

Joko tanü putu nung, denomination shia-i, parnok tamangbaren (religious context) nung amendaker kiyimba yimyaren yanglur (liturgical practices) amshia arutar. Ajasünung, Khristan dang süaka, denomination shia kiyimba yimyaren balala amshiba asenoki angur.

* **Pangdak (Legal) Tenüngdakba:**

Tanü putu nungbo, satiba kuliji, Arogo kuli dang masü saka pangdak tenüngdaktsü ka kümogo. Tetezü, kibong akümba certificateji, Arogo Certificate dang masü saka pangdak/sorkar certificate-a bushitsüla (Court Marriage Registration).

O Rajemshi:

Tanü Khristan kiyimba tangatetba (teachings) aika Tejen aser Tasen Lai nungi angazüka amshiba lir, saka Tejen/Tasen Lai mapang nung, kiyimba yimyarenji (rituals/ceremonies) tanü asenoki amshiba dang nungi khenyongi balaka liasü. Ano, Tejen/Tasen Lai putu mapang nung, tamangbaren aika (ajak ta ashitsü akok), Yihuda nunger sobaliba den sendaktepa liasü, angji, kiyimba yimyarenjia Yihuda nunger sobaliba ama benshiba liasü. Aser alima putu melenshia aruba ama, kiyimba yimyarentemjia melenshia aru, aser ano melenshia aotsü.

Kin/Arogo/denomination kar parnok sobaliba den tamangbaren meyokteper kiyimba yimyaren amshia arur, aser kar parnok tendak apet (context) inyaka arur. Anungji, Khristantem dang süaka, kiyimba yimyaren balala aika alibaji, tamajung ta mangatetsüla, mesüra aseni (Aor Baptist) benshibajidang shidak/tajung aser danga denominationi inyakbatemji majung/temenen ta mangatetsüla. Iba telemsa yabo, asenok Khristantem otsü nung takar (rich history) aliba temaitsü lir aser pei dendak aliba sobaliba-i (cultural influence) tamangbaren nung nungitba ta angatetsüla.


Teburi tetsür ka, pa kinungtsü asütsü asoshi agiba, aser shi nung ka akümbaji Tsüngremer sentong, Lipok 2:24, Mathi 19:5-6. Kiyimbaji Khristai longjemdaktsüba, 2 Kor. 6:14. Kiyimbaji, kinungtsü aser kinungbo tsüngta temeshi tezüngzüktepba lir, Malaki 2:14. Kiyimba benjong nung Yisu aden, Yohan 2:1-11. Apuani tsüngta nung kibong asoshi khuret abenbaji Laishibai sayur, Efesa 5:22-33. Apuani tsüngta shi nung medembaji meshiteta ayutsü Laishibai sayur, Ibri 13:4. Iba ya Khristan kiyimba tesayuba lir. Kiyimba tesayubaji (Teachings & understanding) Laishiba nungi pilatsü makok saka kiyimba yimyarenji (Marriage Rituals/ceremonies/elements,) tatishitsü agi, Sobusolem, tesem, ring amshiba, Ki sobutsü enokba, ken atenba, aser chiyongtsütem asoshi, Laishiba nung tatongi shia mangütsü, kechiaser kiyimba yimyarentemji, tensa aser putu den apet melenshia aruba asenoki angur aser ano adoktsü.

Otem:

Kimyaba tesayuba aser tangatetbaji Laishiba nungi pilatsü makok saka kiyimba yimyarenji Arogo, kin, denomination aser jila balala shia tepila alitsüsa. Tetezü, "Khristan Kiyimba Tesayuba" aser "Khristan Kiyimba Yimyaren" anaji bendanga angatetsüla aser benshitsüla. Aji oda, iba tangatetba liaka, Mungdang ka kübok, Arogotem ajak liromedemtsü asoshi, "Kiyimba Yimyaren" lateta ayubaji tajungba lir. Saka "tekongmerang lemtet" (rigid) masü tajungba. Kechiaser, tetenzük len member kari ashi ama, tensa kar nungbo, lateta aliba nungi ainshitsüsa mapangi bener arutsütsü. Anungji, kodang tamanger teloki "Khristan Kiyimba Tesayuba" aser "Khristan Kiyimba Yimyaren" ana ya bendanga angatetter, mangatetep aser meputepba shisatsü aika nungi kümzüktsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung sorkari Tenla ki 20 dak tema yanglushitsüogo



October 12, 2023 nü police aser bendanger osangbenertemi Pakistan kübok Jaranwala jila nung Khristanem ajurudang tangokba noksa nung angur.

Jaranwala, Mongputeni/October 16 (Agencies): Taküm August ita nung Pakistan nung Muslim nung telok kati Tenla ki aika raksatsüba aser Khristanem amakba sülen sorkari Tenla ki 20 dak tema yanglushitsüba den külemi takoksa angur Khristan kibongtem nem senotsü teyari agütsüogo, ta sorkar ketdangsertemi metetdaksü.

Pakistan nung Khristan anati Muslim nung temeshi kaket 'Koran' raksatsü, ta tai tonglokja August 16 nü Jaranwala jila nung Muslim nungertemi longkak aita Tenla ki aika raksatsüba den külemi Khristanem meyong ki aika rondokja liasü.

Brihostibarnü (October 12) sorkari bendanger osangbenertem anisemer Jaranwala semdanga Khristanem ajuruogo.

Muslim nungertemi longkak aitag raksatsüba Tenla ki ajak sorkari yanglushitsüogo aser

Muslim nungeri ki rongdoktsüba ajanga takoksa angur Khristan kibongtem nem senotsü teyari agütsüogo, ta ketdangsertemi metetdaksü.

Faisalabad nung deputy commissioner, Abdullah Nayyar Sheikh-i, "Tenla ki 22 raksaja liasü aser item Tenla ki yanglushitsüba nung sorkari sen million 124 indokogo," ta metetdaksü.

Tenla ki 22 nungjagi Tenla ki asembo meshimeshia rongdoktsüba liasü.

Deputy Commissioner-isa, "Tenla ki teimbaka sen jenti indoka süshitsüsa liasü. Building department standards nung ajemdaker Khristanem melung asütsüsa Tenla ki ajak yanglushitsüogo," ta metetdaksü.

Faisalabad City Police Officer (CPO), Captain (retired) Muhammad Ali Zia-i, police team kati iba ken o bushisingdangdar; tanü tashi nung aibelener 300 dak tema pua lir, ta metetdaksü.

Muhammad Ali Zia-i, "Item Tenla ki raksatsüba atema FIR 22 benoka lir aser tang tashi nung nisung 300 dak tema pua lir," ta metetdaksü.

Zia-i, Jaranwala nung alir Muslim nungertemi Khristanem Tenla ki meyagluzük tashi tekülem sentong agia atatsü atema Khristanem nem mosques amshia atadaksü, ta ashi.

Paisa, linük nung tamangba yimsü balala amangertem ajak tesünep nung alitsü atema inyaksangshitsü atema police-i Punjab Province nung Centre 57 amenokogo, ta metetdaksü.

Area nung Khristan putir, Major Mashooq Masih-i, "Kedangsertemi Hokolbarnü Muslim nung sarasadem sentong nung adentsü atema pastor tem aser putirtem mosques-i jaoka liasü. Muslim nung lenirtem (Maulanas)-ia yimsü ana amangertem tsüngda tesendaktep tajungba akümtsü atema Arogotem jaoka liasü, ta Masih-isa metetdaksü.

Taküm India nung Khristan NGO 4 indang FCRA registration agienogo

October 16, 2023: Tesüiba küm 9 tsüngda yimsü dak sendakba non-government organisations (NGOs) 407 nem India sorkari temelaba agüja liasü, aser iba nungjagi NGO 147 bo Khristanem dak sendakba lir, ta Ministry of Home Affairs (MHA) ajanga metetdaksü.

Melungtet telok (NGOs) balalai bendanglen nungi senotsü tenla angutsü atema Foreign Contribution (Regulation) Act (FCRA) kübok registration agitsü nungdak aser melungtet teloktem jagi bendanglen nungi anguba senotsüji sobaliba sentong atema asü, rongsenkettsüng, shisaliok, yimsü mesüra loktiliba sentong nung amshitsüar osang tejangja metetdaksütsüla.

Ajisüaka melungtet telok aikati senotsüji yimsü dak sendakba atema amshitsü, ta metetdaksü yimsü dak sendakba nung amshir.

Ozüng alema inyakba agi taküm sorkari FCRA registration pezü agienja liasü aser item NGOs pezüpronglaji Khristan organisations lir. Khristan organization pezüji-Tamil Nadu nung Shekina Prophetic Mission Trust, Karnataka nung Holy Berachah Ministries, Kashmir Evangelical Fellowship aser Jammu & Kashmir nung Bethel Charitable Trust liasü.

Bendanglen nungi anguba tenla (fund) ji Jammu nung tangartem Khristan yimsü dangi meyipdaksütsü aser Tenla ki asütsü atema amshi, ta tai tonglokja Kashmir Evangelical Fellowship aser Bethel Charitable Trust indang FCRA license agienja liasü.

Home Ministry data ajanga ashiba agi, 2014 küm nungi tenzüka taküm October 1 anogo tashi nung FCRA kübok association ajak senteper 3,217 register süogo, aser iba nungjagi NGO 194 bo "religious-

Christian" kübok register asüba lir, NGO 139 "religious-Hindu" kübok register asü aser tanga NGO temji tanga yimsütem kübok register asü.

2023 küm FCRA kübok Khristan organization 26-i registration agi aser Hindu organization 27-i registration agiogo.

Bendanglen nungi fund anguba inyakyim teladak asütsü nükjidong nung tawa Home Ministry-i temzüng yanglushi, aser item temzüng kübok NGO temi bendanglen nungi anguba senotsü agi alizükba kiojen/osetsüset sangdongtsü tuyur.

Taoba ita MHA-i FCRA kübok register süa aliba NGOs ajaki küm shia senotsü anguba osang sangdongba dak sendakba temzüng yanglushi.

Tesüiba küm pongu tsüngda linük nung NGOs 6,600 indang FCRA license agientsüogo. Tanü tashi nung linük nung NGOs 20,693 indang FCRA license agientsüogo.

ANOGO ABEN TSÜNGREM DEN

Tamang Tetsüng - Ibr 11:8

Asenoki nisung kar dak temulung toka lira pai/lai ashibaji asenoki mela-mela inyaksür. Ibr 11:8 kaket nung Abrahami iba ochi tatishitsü sayuba angur. "Tamang ajanga Abrahami tashi anga" (Ibr 11:8). Pai Tsüngrem dang "tembar" ka ama amang. "Pa dang Tsüngremi tembar ta aja" (Yakob 2:23). Tsüngremji Tebu ta atema dang masü saka Paji tembar ka ta sayutsü Yisu aru. Tashi angaba ajanga kibong nung tanur aser tsürabur tembar ama jangratema alir. Yisu alima aliba mapang Pai temenen pur aser temeshpur ajak den tembar küma liasü. Pa dang "Temenen purtem tembar" ta tenüng agütsü aser Pai Pa nütsüngtem dang tembartem ta aja. Amangtsü aser temulung lema alitsü asoshi tembar akümtsübaji kimong lir.

Tsüngremer ozüngtem asenok dangi Pa otem ajanga arur. Asenok item O nung mamang tashi angatsü makok. Adami tashi manga kechi Tsüngremi tajung aser tamajung metetba süngdong indang Pa dang ashiba Pai mamang. Mamangba agi Israel nungeri Tsüngrem dang tashi manga (Ibr 3:18,19). Tanü theology melen technology adokba putu ka nung Tsüngrem dak amangba tamang ayutsübaji temüla masü. Sayutsüngiba ren asertesayubaren ajak technology tsütsüi atsür odaksür.

Tsüngremi itemji maitsür. Shidak inyaksü itemji tenüngdaksü. Saka ajak Tsüngrem O koba memelenshir alir iba O-i ashiba ama alitsüla. Peter aonung tepiyong ango bushir kecha mapu, teyimla samar liasü.

Yisu ango pur masü saka sung mapa inyaker ka liasü. Kodang Pai Peter dang zütsük tzü tarok nung aotsü ashi, Peter asoshi ibai amangtsü tasak liasü. Saka kodang Pai ango apuba temetetba Yisu O nung ayu, pa asoshi tashi angatsü temüla aküm. Pai ashi, "Aji oda süaka nai ashiba ama" (Lk. 5:5).

Iba ama tamang Tsüngrem O maneni angashiba ajanga arur. Azüngba kisüng nung masü, saka angashiba ajanga tetezü azüngba shiaji Tsüngremi jembir ta angatetba. Angashiba jagi amangdaksür aser amangba jagi tashi angaba nung yarir (Rom 10:16,17).

Mamangba ajanga temulung merangdaksüra tashi angatsü tasak kümdaksür. Ibr 11:8 kaket züluri asenok nem tekümdangtsü agütsür, "Adianutem, taküm Tsüngrem nungi tsüktsüsa nenok kar dak mamangba temulungjang malitsü kümdangang" (Ibr 3:12). Kodang asenoki asenok dang ajasangji "taküm Tsüngrem" ta angatetter, tanur ka pei tetsü teku nung temulung lema ajungba ama bilemstsü. Shisabulu mali. Tebilemstsü mali.

Shiba Tsüngrem dang tashi angar, Tsüngrem dak amanger; aser shiba Tsüngrem dang tashi anger pai Tsüngrem dak amanger (C.H. Spurgeon 1834-1892).

Hamas aser Israel tsüngda rara ajanga Khristanem kanga timtemer

October 16, 2023: October item kuli ajanga talisa 7, 2023 nü Gaza strip nungi Khristanem timtemdar.

Hamas kiralongartemi Israel Iba dak alia 2007 küm Bible amak tenzüka sülen Israel-ia Society-i ajangshiba ama tang Gaza Strip mokdang amaker; Gaza nung Islamic kiralongartemi Khristanem amak tenzüko. Talisa Muslim yimsü toktsür Khristan yimsü agizükertem kanga timtemdar.

Gaza strip nung Khristan nütsüng ishika dang lir aser iba rara ajanga Khristanem kanga timtemdar. Nütsüng million 2 shi aliba Gaza nung Khristanem tesüiba küm16 tashi timtema aruba sülen tang rara ajanga Khristanem timtem tuluba bendenlokogo, ta International Christian Concern (ICC)-i metetdaksü .

Hamas aser Israel na tsüngda rara tenzüka sülen Gaza nung rongsenketzung jenjang aser health services mejungi akümba den külemi senzüsemping nokdang, aser

AO OSHI ANGAZÜKDAK:

TANÜ ANGAZÜKTSÜBA OJANG



Sannüker

(n) san metsüa anepalur nisung (shepherd)
* David sannüker ka liasü. Pastor danga sannüker ta ajar.

Sanu

(n) Tzü nung aliba küra mesükba shiruru (turtle)

OLONG PAITEP # 6669

1				2				3		4
5		6								
							7			
8										
										9
			10				11			
				12				13		
14										
							15			
16										

TIPIEN	LANGTSÜNGLEN
2. Auonungchiyongsüasenba	1. Lenmang - (7)
5. Mangyimba mapang	2. Aor kidong ka tenüing - (6)
7. O tamendakdak	3. Tenarong maten - (6)
8. Peidak malangba	4. A _ _ _ g - (3)
10. Julü	6. Mopung apodoka - (3)
12. Sen ayudak	9. Tongtipang tagitsü - (7)
14. Tenük agi ajitet	10. Menungra bilem - (6)
15. Tamajung aküm	11. Aiür - (6)
16. Apuso	13. S _ _ _ k - (3)
	14. T _ _ _ r - (3)

OLONG PAITEP # 6668 TELANGZÜBA

TIPIEN :	LANGTSÜNGLEN :
1. Yiar, 3. Tesola, 7. Yimra,	1. Yimti, 2. Amen, 4. Shiner,
8. Tangar, 9. Peria, 10. Tanur,	5. Alaka, 6. Satan, 9. Putet,
11. Tasen, 13. Lemjem,	10. Tembar, 11. Tatok,
15. Tambu, 16. Khuret,	12. Amang, 14. Jala.
17. Sang.	

NAI-A YA METETTER MA

1948 KÜ NUNGI ISRAEL NUNG PRIME MINISTER INYAKERTEM YAMAI :

(Yashi adok nungi...)

Name (Lifespan)	Term of office	
Ariel Sharon (1928–2014)	7 March 2001	28 February 2003
	28 February 2003	21 November 2005 ^[7]
	21 November 2005 ^[7]	(4 January 2006) ^[8] 14 April 2006
Ehud Olmert (born 1945)	4 January 2006 ^[9]	14 April 2006
	14 April 2006	4 May 2006
	4 May 2006	31 March 2009 ^[9]
Benjamin Netanyahu (born 1949)	31 March 2009	18 March 2013
	18 March 2013	6 May 2015
	6 May 2015	9 April 2019
	9 April 2019	17 May 2020
	17 May 2020	13 June 2021
Naftali Bennett (born 1972)	13 June 2021	30 June 2022 ^[10]
Yair Lapid (born 1963)	1 July 2022	29 December 2022
Benjamin Netanyahu (born 1949)	29 December 2022	Present


Opangtongdang-i Black Rich atema Brand Face inyaker

Dimapur, October 16, 2023

(Agencies): Opangtongdang Jamir-i "Black Rich Dimapur" atema Brand Face asütsü shimogo.

Black Rich ya teburtem indang Suit brand ka lir aser jenjang dalang agi Dapper, Classic aser Tuxedos den Tailored comfort fit suits ayoker. Kenye Complex, Hongkong Market Dimapur nung iba brand indang doka pungu lir.

Naga Fashion Supermodel, Influencer, Mister International India 2012 aser Pageant Coach Opangtongdang Jamir-i Black Rich atema Brand Face



Opangtongdang Jamir

inyaktsü.

Opang-ia Brand Face inyaktsü shimba atema pelaba metetdaksü aser tang mezüing atema campaign shoots & creativity maparen inyakogo.

Talisa kiyimba mongpu aruba mapang "grooms to be" aser Best Man temi "Black Rich Dimapur" nungi suits alitsü akok.

October 8, 2023 nü Niathu Hotels and Resort nung mezüingbuba photo-shoot agia liasü. Ano November 2 nü tanabuba photo-shoot agitsü aser idangji suits tasen kar sayatsü.

Manipur bomb lendong atema Assam nung nisung 1 apu

Silchar, October 16, 2023

(Agencies): Manipur nung Kwakta bomb pokdaksüba ken o dak sendakba nung National Investigation Agency (NIA)-i Assam nung nisung ka nguogo.

Cachar district kübok Silchar nung iba nisung apu aser pa ya Md Noor Hussain ta jangjaogo.

NIA-i Assam police teyari agia Hussain apu. June 21 nü

Bishnupur district kübok Kwakta jila nung SUV ka nung bomb pokdaksüba maparen nung pai shilem agi ta tai tonglokja lir.

Manipur nung Kuki aser Meitei nunger tsüingda raraba tiyalong nung June 21 nü Kwakta bomb lendong ataloka liasü.

IED-laden Scorpio vehicle

parked over a bridge located in the area of Phougakchao Ikhai Awang Leikai and Kwakta along Tiddim road in Bishnupur District, Manipur. Phougakchao Ikhai Awang Leikai nung aliba apu ka nung Scorpio gari nung IED enoker pokdaksü.

Iba lendong nung nisung asem yiru aser anameta aliba kiojen raksa.

Mizoram nung Congress candidate 39 tenüing metetdaksü

Aizawl, October 16, 2023

(Agencies): Congress-i Mizoram nung constituency 39 atema candidate shimba osang metetdaksüogo.

November 7 nü Mizoram assembly elections agitsü aser December 3 nü votes azüngtsü.

Rahul Gandhi-i anogo ananü atema Mizoram semdangi arudang Congress party-i

candidate metetdaksüogo.

Mizo National Front (MNF) aser main opposition party Zoram People's Movement (ZPM) ajanga constituency 40 atema candidate tenüing metetdaksüogo.

BJP-ia taruba anogo ana asem tsüingda Mizoram elections atema candidates sangoktsütsü imlar.

Rahul Gandhi-i October 16 nü anogo ananü atema Mizoram semdangi arua lir. Assembly elections jakdang Congress atema nüboyimtsü asoshi pa aru.

Hombarnü Rahul Gandhi-i Chanmari nungi Raj Bhawan, Aizawl tashi Padyatra (foot march) sentong nung shilem agia liasü.

Rahul Gandhi-i Tripura Congress lennirtem den ajurutep



Congress lennir Rahul Gandhi-i Mizoram semdangi arudang Tripura yimtiba Agartala nung aliba Maharaja Bir Bikram Airport nung khen atema anenzükdang tangokba noksa angur.

Agartala, October 16, 2023

(Agencies): Congress lennir Rahul Gandhi-i Mizoram semdangi arudang Tripura yimtiba Agartala nung aliba Maharaja Bir Bikram Airport nung khen atema anenzüka liasü.

Idangji Tripura state president Ashish Kumar Saha aser taoba minister Sudip Roy Barman na dena lennirtemi Rahul den ajurutep.

"Rahul Gandhi-i tayimtsü

ka ajanga Agartala nung arua anenzük aser idak nungi helicopter ajanga Mizoram-igo. Pa asüing Agartala-i arutsü aser New Delhi-i apusoa aotsü" ta Congress Working Committee züingsem Barman-i ashi.

"Pai onok den ajurutepnüa liasü aser iba jagi onok arua tongtipang onük kar lemsatepogo. Onoki Tripura nung party ketdangsubaren indang jemi" ta Barman-isa

Mizoram, Madhya Pradesh, Chhattisgarh, Rajasthan aser Telangana nung Assembly elections agiba sülen Rahul-i Tripura semdangtsü osang metetdaksüogo ta paisa ashi.

Tayimtsü anendak MLA Gopal Chandra Roy, taoba All India Congress Committee züingsem Baptu Chakraborty, Rakhu Das nungeri Rahul Gandhi den ajurutepa liasü.

Nawaz Sharif Pakistan-i meyipa arutsü renema lir

Islamabad, Mongputeni/ October 16 (Agencies): October 21 nü Punjab province yimtiba nung lokti senden ka ayongzüka amenba mapang taoba Pakistan Ato Kilonser Nawaz Sharif-i, linük rongsen ketzüng mejungi aliba nungi anitetsü atema tasa kar lemsatepsü, ta media sangdong ka ajanga Hombarnü metetdaksü.

Lahore district administration-i Deobarnü Pakistan Muslim League-Nawaz (PML-N) party nem Minar-e-Pakistan nung lokti senden ka amentsü atema temelaba agütsüogo. Nawaz Sharif iba hopta tatem linüki meyipa arutsü lia pa pusemertem anidentsü nükjiong nung PML-N puri iba senden amentsü asoshi temelaba meshia liasü.

Mustafabad nung party convention ka nung PML-N

Vice President Hamza Shehbaz-i ashiba agi, iba hopta PML-N party tekolakba meyipa aruba sülen Pakistan yimyimjung nung renloka aotsü tenzüksütsü.

"Minar-e-Pakistan nung o jembiba mapang Nawaz Sharif-i linük rongsenketzüng mejungi aliba nung anitetsü atema lenmang ka sayutsü," ta Hamza Shehbaz-i ashi.

International Monetary Fund (IMF) den tenangzüktepba ka meyangu asübo Pakistan bankrupt sür lila, ta Hamza-i ashiba den Imran Khan-i aniba Pakistan Tehreek-e-Insaf (PTI) sorkari linük rongsenketzüng kanga mejungi kümdaksüogo.

Hamza shiba taoba PM Shehbaz Sharif'er jabaso lir, paisa, PML-N indang politics ji terenlok asoshi lir saka Khan-i aniba PTI sorkari tesempatem politics asayar, ta ashi.

Pai May 9 nü tatalokba indang tatishitsü bener arua jembi.

PML-N lenir Malik Ahmed, shiba taoba PM Shehbaz Sharif teyarir ka liasü pai ashiba agi, October 21 nü ya tanga anogo ama masütsü saka linük terenlok asoshi tenzüksütsü anogo ka asütsü.

Nawaz Sharif agizüksüba atema dang masü saka PTI dang tashi sayutsü asoshi lokti senden ka ayongzüka akatsü asoshi PML-N renema lir.

Minar-e-Pakistan nung lokti senden ayongzüka agitsü atema temelaba meshiba aser PML-N lenir Bilal Yasin-i senden mapang mepetmesü kar danga adokra pai khuret abentsü ta nangzüka affidavit ka benokba dak ajemdaker deputy commissioner indang office-i party nem no objection certificate (NOC) ka agütsüogo.

Russia foreign minister-i North Korea semdangtsü

Moscow, Mongputeni/ October 16 (Agencies): Russia indang foreign minister Sergei Lavrov-i iba hopta Bodhbar aser Bresttibarnü North Korea semdangtsü ta North Korea indang state media KCNA aser Russia foreign ministry-i Hombarnü metetdaksü.

North Korea lenir Kim Jong Un-i Russia semdangba sülen ita ka lir tang Lavrov-i iba linük semdangtsü lir. Russia semdangba mapang Kim-i tir Vladimir Putin den ajurutepa North Korea indang satellite programme aser Ukraine nung rara indang densema military dak sendakba nung linük ana tesendaktep atema sensaksemogo.

Linük ana tsüingda tesendaktep tali akangshia aoba ajanga Ukraine nung Russia indang military tali tashi taitba kümdaksütsü aser kasa mapang nung UN bangzüng ajanga tenokdangba agütsür aliba missile technology North Korea nem agütsütsü akok ta tebilemtsü ka-a bilemer.

Ukraine rara nung amshitsü atema Pyongyang-i Moscow nem prangbong injang agütsüba atema Washington-i North aitsüogo, kong North Korea indang ammunition depot ka nungi injang agütsüba densema lir. Ajisüaka linük anapronglai iba taitüba ya magizüki arudar.

South Korea aser United

States indang Nuclear envoy tem Indonesia yimtiba Jakarta nung Hombarnü senden ka menogo aser ozüng alema Russia aser North Korea na military dak sendakba nung kecha tesendaktep mayutsü tekümdaksü metetdaksüogo, ta South foreign ministry-i ashi.

Envoy temisa North Korea-i iba ita parnoki sangdongba ama spy satellite ka khaketa yokra telangzüba tesashi agütsütsü, ta shiogo.

"Korean peninsula aser alima ajunga nung yimjung aser tamendakdak anokshitsüsa North Korea-i temzüng ozüng anema inyaksangshira jenjang tesashi agitsü bangjemogo," ta ministry-isa kasa sangdong ajanga metetdaksü.

Gaza nung chiyongtsü, tzü, mozü aser tasü mang asepa bags agimar: UN

Jerusalem, Mongputeni/ Oct. 16 (Agencies): Gaza nung meimchir asoshi tensa tamajungba akumba indang tekumdangtsü alima dang metetdaksüba mapang, nütsüng yongsük onsara aliba tesem - Gaza - ya alenseter, ta UN indang Palestinian refugee agency ajanga Hombarnü ashi.

Gaza nung alirtem tzü, chiyongtsü aser mozü agi kanga anünger aser southern region nung kaket reju aser facility balala nung jenoktsü arur timba akumer, ta UNRWA ajanga ashi.

October 7 nü Hamas-i amakba sülen mitkar temi operation tenzüksü renemshiba mapang north tsütsü aliba Palestine nunger dang ainshitsü Israel-i totuyuba agütsüba sülen anidaka nisung meyirijang aikati anidaker.

"Tzü tebilemtsü indang reprangdangra, tzü ya takum ta asenok ajaki meteta lir - Gaza nung tzü tagimar, Gaza nung

takum tatemer," ta UNRWA indang commissioner-general, Philippe Lazzarini-i Deobarnü Jerusalem nung osangbener senden ka nung ashi.

"Iba den külemi yakta chiyongtsü aser mozü agimatsü. Taoba hopta Israel nung amakba ya kangasa tetsübotsüka lir. Amakba aser nisung pua bener aoba ya international humanitarian law nung

(Maneni tapak 8 nung...)

aibelenba lir. Saka civilian tepsetba langzüa civilian tali metepsettsüla."

Gaza nung anogo pongu tashi electricity mali arur, ta UNRWA ajanga ashir. Gaza nunger tajemtsü tzü kanga anünga kumogo. Nüburtem alu nung aliba tzübo nungi tzü tamajung ajemer, anungi tashidak adoktsü.

Office of the Sub-Treasury Officer Changtongya : Mokochung METETDAKTSÜR

Sub-Treasury Office, Changtongya nungi ita shia Life aser Family Pension agizükba pensioner ajak 2023-24 asoshi Physical verification tsünglanglen agüja aliba anogotem nung agitsü metetdaksür:

- a. Life Pensioners - 18th October, 2023
- b. Family Pensioner - 19th October, 2023

Pensioner ajak nungdakba kuli kaketem den physical verification agitsü metetdaksür, aji mesüra iba sülenbo pension sen agütsüba anentsü.

Sd/- Noklemba Sub-Treasury Officer

MULUNGNEN O



ASO
7TH JULY 1942

ASU
12TH OCT. 2023

Kodanga amadoktsü makokba ojala I. Merensola (Merangkong) la shirangba mapang nungi tenzüka akümüli nungi pila-a ao nü tashi onok mangyim jashi aser mulungzürep tia nung alidang, kija, kibong aser lokti-tentet balalai nübo, rongsen, shisatsü aser sarasadem ajanga shirnokisa ozü den yaritepogo nenok ajak dang meshitetba tepela lemsateper, tulusang Tsüngremi nenok ajak moajangma.

Temeim Jabaso, Jala, Semchir-semnur aser Kinungertem.

MULUNGNEN O



ASO :
20/12/1947

ASÜ :
08/10/2023

Onoki teti meima aser anepalua aliba ozü tsürabur asür Toshikala (Mongsenyimti) la temang manemi aliba mapang nungi tenzüker asüba anogo tashi nung adianu, kinungertem, yimer yimsanger, tembartem, kiyongertem, temeimertem aser lokti balala, ano la mapang shia anepaluba Doctors aser Nurses den staffs shirnokisa ozü dak malangba temoatsü teyari, nübo, shisatsü aser rongsen jenti agi asükho mapang tashi lemsatepogo nenok ajak dang kanga pelar. Ozüni nenok mapa tajung mamadoktsü aser onoki nenok nem lepa magütsütetaka tajung Tsüngremi nenok mapa tajung asoshi maneni mojangni ta onoki sarasademtsür.

~ Temeim Chirnur, Semchirtem, Adianu, Anükapang aser Kinungertem.

Office of the Longjakrep Semchir Kichu Mungdang Mokochung, Nagaland SANGDONGER

Ao kin sanger mezüng lipok Ongterok liasü, idak nungjagi Chungliyimti mesemteta aküm, koba Ao kin yimkong sobaliba tamendakdak mezüng kimongji liasü. Alemlü Tetsü-Tebou lipoklisang tsüraburtem mulungzüng tanü Ao kin sangeri ashikanga mesamai amita lia arudar. Ao kin sanger tebou asem dang tetshia jembia aruba angazük. Tongpok, Longpok Longjakrep, par tebou asem nungi soyapokya nütsüng jenti rena shijang, tenük balala pei-i alangzüka naroküm ja-a aruba angur. Item rongnung Ao lima alir Jamir ajunga tebou Longjakrep liasü, pa nungi jakzüka aluba süiren (Genealogy) naroküm aika dang lir, item rongnung KICHUTZAR ya shir naroküm aser kodasür jatet, iba teratet otsü tejangja "LONGJAKREP SEMCHIR LIREM KAKTET" Kaket Otsü aser "MOKOKCHUNG KICHUTZAR OTSÜ" kaketem nung tabensa angutsü ta Longjakrep Semchir Kichutzar Mungdang office ajanga jangjatsür.

- | | |
|-------------------------|-----------------------------|
| 1. Tekameren Kichu | Mokokchung - T. Meson |
| 2. Imkongangshi Kichu | Khensa - [Signature] |
| 3. Lanutoshi Kichu | Aliba - [Signature] |
| 4. Bendangnuksung Kichu | Chungtia - Bendang |
| 5. Taliwati Jamir | Mangmetong - [Signature] |
| 6. Watitemsu Kichu | Mekuli - [Signature] |
| 7. Tiasunep | Khar - Samep. |
| 8. Talinokcha Kichu | Mapingchuket - [Signature] |
| 9. Meyayongdang Kichu | Chungliyimsen - [Signature] |
| 10. I.Temjen Jamir | Longjang - [Signature] |
- (I.Mangko Kichu) Tir. LSKM
(I.Wapang Kichu) Tongti zulur LSKM

Leylah Fernandez-i Hong Kong Open kokogo



Mongputeni/October 16, 2023 (Agencies): Hong Kong Open tetsür kija asaya final nung Leylah Fernandez-i set ka menoki aliba nungi meyipa arur Katerina Siniakova kokogo.

Canada tsürila yagi la indang career nung tang agi title tasembuba aser ita 19 tsüingda mezüingbuba title benogo.

Fernandez, shiba tang WTA rankings nung jenjang 60buba nung lir la jenjang 85buba nung alila Siniakova den final asaya liasü. Fernandez-i lai imlaba ama asaya junga metenzüktet aser Siniakova-i la indang serve ana tashi break süa mezüingbuba set 6-3 agi akok.

Ajisüaka tanabuba set nung Fernandez-i meyipa arur kanga

junga asaya aser la 4-0 agi tejkandag ser tenzük. Iba sülen Czech tsür, Siniakova-i court toktsür oa temang anepalutsü atema mapang agitsü asoshi telemetba agi aser la tetsüing tabelen aleper taanaben court telungi aita liasü.

Iba sülen lai asendenshir tajungba asayateta 3-4 aküm, ajisüaka Fernandez-i temulungtetba tulu nung asaya break points trok tashi kümzüik aser la indang serv break mesüdaktsü asaya koka liasü.

Set kaka koker tasembuba set asayaba mapang asayar anapronglai kati ka indang serve break sütepa asaya, saka Fernandez-i kanga dang tongtibatang mapang ka nung Siniakova indang serve ka

break süa 5-4 agi la tejkandag aküm aser iba sülen la indang serve break mesüdaktsü asaya koka liasü.

Tena tsüingda final asaya ghonda anaser minute 49 asaya liasü.

Asaya nung takok tajung ngutetba indang jembiba mapang Fernandez-i, taoba küm ishika tsüingda tetsükdaktsü aika ajangshia aruba indang lemsatep. Lai la takok asoshi lar kibong, coach aser performance coach dang kanga pelaba lemsatepa liasü. Iba asayamung akokba ya Fernandez asoshi la indang career nung alizüing tasen ka tongtetba dang masü saka la taruba hopta ranking sayaba mapang top 50-i aitsü.

Gaza nung chiyongtsü, tzü, mozü aser...

Taoba hopta nisung million ka pei kidang nungi jena ogo, ta UN ajanga asadanteta lir. Pei kidang nungi jena aoba nisung 400,000 shi UNRWA school aser ki balala nung tsüingtena lir, aser itemji timba 'emergency shelters' ama masü. Tesem ajungalen dangari müketbanga aliba Gaza nung nütsüing yongsük tali lir aser yangji mürekmeju maka, ta UN agency ajanga ashir.

"Israeli Forces temi iba tesem yutsür ainshitsü totuyuba agüjaka Internally Displaced Persons (IDPs) züingdangtsü makoki North nung aliba UNRWA school tem nung lir. UNRWA ajanga meyariteter mesüra kumzüika meyteter," ta UN agency ajanga ashi.

Ketdangsür temi ashiba agi Gaza nung mozüki nung yipten 3,500 lir. Ainshitsü tuyuba ya Gaza aser north Gaza nung mozüki 23 nung kongshir, aser item mozüki nung ajak senteper yipten 2,000 lir. "Nisung asüba timba akumer. Gaza nung asürtem aseptsü asoshi body-bags peria mali," ta UN agency ajanga ashi.

Hombarnü Israeli Defense Forces (IDF) ajanga video footage sayaba nung ' Hamas Jihadists Squad' ajanga October 7 nü linük amakba aser nisung tepseta aoba liasü. Minute asem jungnüa video nung

ajungbena amakba, prangbong bena alirtem Gaza nungi nok-nü bener security barriers ajanga aitba sayu.

Kiralongrartem motorbikes nung mener arütsü alema aoba aser yin agi atsü atsüa alidak tapok ka ajanga aoba video nung sayua liasü. Israel litsü aitba sülen kiralongrartem ki ka nungi kati oa Israel nung alidak tapi agi injang khalokja liasü.

"Tekumdangtsü. RAW FOOTAGE: Hamas jihadists squad temi tai maket Israel nung maka tepsetba. Apuba kiralongrartem Israeli security forces ajanga tepset," ta IDF ajanga taoba mapang Twitter ta ajaba X nung lemsatep.

Taoba hopta Hamas telungpuri Gaza aser Israel sadangba land security barriers ajanga aita Israel nung nisung 1,300 shi tepseta liasü. Kasa mapang Gaza nungi rocket zünger mezüingmai khalokja ali nungi amakertem yaria liasü.

Kasa mapang Iran-i Israel dang mitkartemi ali nungi Gaza makra region nung tensa tamajungba akumtsü, ta tekumdangtsü shiogo.

"Gaza Strip nung Israel nungeri tanurtem tepsetba tangsa anendaktsütsü nükjidong nung mera agiba tangatetep kati maruteta, tesem aisülen lapoktsü," ta Iranian Foreign Minister Hossein Amir-

(Tapak 7 nungi...)

Abdollahian-i Deobarnü ashi.

"Zionist entity (Israel nung) Gaza-i aitsü telemetba agira, resistance lenirtemi item sepaitem asoshi leper kumdaktsütsü," ta pai ashi.

October 7 nü Hamas-i Israel litsü amakba sülen Israel-i tayimtsü amshia Gaza amakdang nisung 2,670 dak tema tepsetogo aser ano 10,000 jungnüa yirua lir.

Israel nunga sepa 289 aser bendanger kar densema nisung 1,400 shi tepsetogo, ta ketdangsurtemi Deobarnü ashi.

Amir-Abdollahian-i Honibarnü Hamas lenir Ismail Haniyeh den Qatar nung ajurutepa liasü aser parnok Gaza timtem indang jembiba aser maneni amalitep akatsü molungtep, ta Hamas-i sangdong ka nung ashi.

Iran indang Supreme Leader Ayatollah Ali Khamenei-ia Islamic linük ajunga lungjemer Palestine nung yaritsüla ta Honibarnü shia liasü.

Amir-Abdollahian yagi Iraq, Lebanon aser Syria semdanga item linük lenirtem den ajurutepa liasü.

"Zionist yimli-i civilian aser pei sasa kumzüiktsü tashi maliba Gaza nung dak amakba manenra, shingaiia tensa azüoktsü mesüra rara tuluba makumtsü ta meshitetsü," ta Qatar leniri shia liasü.

Zaleo-i Nagaland state Futsal Championship tenzüktsütsü

Dimapur, Mongputeni/October 16 (TYO): Advisor Urban Development and Municipal Affairs, Zaleo Rio-i October 17 nü nikongtsütsü 4 ako nung 3buba Nagaland state Futsal Championship tenzüktsütsü.

Iba asayamung ya JJ Arena Chumiukedima nung asayatsü.

Anogo 4 asayatsü aliba asayamung ya Nagaland Football Association-i ayongzüba lir aser Chumiukedima Football Association-i achayanga asayatsü.

Ajak senteper iba asayamung nung team 16-i shilem agiba angutsü.

Nagaland Football Association tatong Tir Kujeka

S Sumi-i ashiba agi, iba asayamung ya club asayamung ka asütsü aser district ajak nungi team kakati shilem agitsü.

District kar shilem magiba ajanga Kohima aser Dimapur district nem team anana asayatsü asoshi maongka agütsüogo.

Asayamung nung takok anguba team ya Nagaland tenüing nung National Futsal Championship nung asayatsü, koba December ita asayatsü renema lir.

Iba asayamung nung takok anguba team nem senpet sen 1,00,000 aser Runners up team nem 50,000 agütsütsü, ta asayamung ayongertemi metetdaktsü.

AR-i Peren jila nung asaya dang amshiba osettem lemstsü

Dimapur, Mongputeni/October 16 (TYO): Local tem ajungkettsü atema maneni inyaka aruba nung shilem ka ama Assam Rifles-i Peren jila nung lanur lokti tentet aser Christian English School Tesen, Peren, nem October 16 nü asaya dang amshiba osettsütem agütsüogo.

Saisapong nung lanurtem temaba jenjangi ajungkettsü nükjidong nung item asaya dang amshiba osettem ya agütsüogo.

Asaya dang amshiba osettem ya agütsüba nükjidong tongtibangtibaji lanurtem saisapong nung shilem agidakja temeseba mozü amala nungi pila lidaktsütsü asoshi liasü.

AR-i lanurtem nem football, volleyball, basketball, badminton racket, badminton shuttle, cricket bats, stump, tennis ball aser asaya dang amshiba tanga osettem agütsüogo.

Assam Rifles-i iba tesem

yimjung nung tekümzüikba kübok toktsütsü atema inyaksangshiba dang masü saka wadang ajak nung nüburttem aser talisa lanurtem ajungkettsü atema takokba tashi inyakdar.

Iba inyakyim ajanga lanurtem asaya nung parnok sempet aser skill bushiteta tangar nem metetdaktsütsü asoshi ajungmesogo. Maneni saisapong ajanga career yanglutsüba, anema toktsüba aser tarutsü tajungba kümdaktsüba indanga AR-i lanurtem den lemsatepa liasü.

Iba sentong nung organising committee, Peren Town Youth Organization tir, CES staffs aser Executive züingsemtem aser lanurtemi shilem agi aser lanurtem atema süoki ia o agi dang masü saka mapa agi inyaka sayuba atema parnok ajaki Assam Rifles dang kanga pelaba lemsatepa liasü.

KTC Championship Nov. 11 nungi alitsü

Kohima, Mongputeni/Oct. 16 (TYO): Kohima Town Club ajanga 5 buba Kohima Town Club Championship 2023 football asayamung November 11 nungi tenzüka November 25, 2023 tashi IG Stadium Kohima nung alitsü ta sangdongogo.

Iba asayamung ya knock-out yimya nung asayatsü, anungji Nagaland aser danga state tem nungi iba asayamung nung shilem agitsü club tem jaoker, ta sangdong ajanga ashi.

Taküm iba asayamung nung senpet sen ajak senteper 5,10,000 alitsü aser Champion team-i sen 2,20,000 agizüktsü, runners-up team-i sen 1,40,000 aser semi-final tongtetba team shia sen 30,000 angutsü.

Kija nem agütsüba sempet tem rongnung Player of the

Tournament asoshi senpet sen 20,000 alitsü aser ano best goalkeeper, defense, midfielder, highest scorer, coach, referee, aser best fan club nem senpet sen 10,000 agütsütsü.

Iba asayamung nung shilem agitsü asoshi form ya October 20, 2023 nü nungi angutsü, anungji tejangrar temi 9916580774 ajanga tongteprateptsü akok, ta sangdong ajanga ashi.

"For the Community, for the Game" omen nung ajemdaker Kohima Town Club ya December 1, 2016 nung züingsem 35 agi tentet aser football ya Kohima nung kisüing masü saka Nagaland tesem ajunga nung ajungkettsü par nükjidong lir.

BILEMDANGANG

"Arishi kanga tatsüka dang lir, tangar jilu ia nü mapang telalo."